



*Kamis, 04 November 2021*  
**Ogen: Esekiel 18:14-24**



**Kalak Si Mehuli Ndat Upah**



**W** *Buah jatuh tidak jauh dari pohonnya.*” Peribahasa enda mekatep nuriken maka perbahanen anak labo banci pedauhisa ras perbahanen orang tua. Orang tua la meteh mehuli anak pe la meteh mehuli, janah adi orang tua mehuli anak pe mehuli. Perukuren enda mbue jadi sukat-sukat geluh. Tapi wari enda petembil ras perukuren si datas, ogenta nuriken maka perbahanen anak la ngusih perbahanen bapana. Bapa ngelakoken perbahanen si meluat tapi la e iusih anak. Anak e, ipakenna ras ipatuhina undang-undang Dibata. Kata Dibata jadi stabilisator kegeluhenna. Aminna sekelewetna kerina ngelakoken si jahat, tapi ia tetap ngelem si benar. Enda sada prinsip si sulit erkiteken kerina kalak enggo ngelakoken si jahat, termasuk orang tuana. Semalna lit perukuren ngikuti jelma si enterem, uga kalak bagelah kita. Mekatep ka pe posisi aman ibereken man kalak si ngikut jelma si enterem.

Perukuren si peduaken e me adi bapa ersalah maka ikut anak nanggung ukumen orang tuana. Duana perukuren si bage lit i bas kegeluhen kalak Israel, tapi i bas paksa enda ituriken maka anak si patuh ras tutus ngikutken undang-undang Dibata, la ngusih perbahanen orang tua rikut ras lingkungan si la mehuli. I bas ia lit integritas si ncidahkan kepatuhenna man Dibata. lingkungan la ngasup mempengaruhi ia ku bas si jahat. Kalak si bagenda ndatken upah i bas Dibata e me ngeluh ngenanami kiniulin i bas Dibata nari. Labo ia nanggung ukumen kesalahan silakoken orang tuana. Tuhan mperdiateken kepatuhen, ketutusenna dingen mereken kiniulin ku bas kegeluhenna.

Tetap gelem pengarapen nggeluh i bas si benar. Aminna pe i lebe-lebe matanta melala si jahat ianggap benar, kita la banci ikut-ikuten kerna si e. Ingetlah Dibata pasti mereken upah kalak si ngeluh i bas benar. Prinsip geluhta arus tetap ngeluh i bas si benar sentudu ras sura-sura Dibata.